



REPUBLIKA E SHQIPËRISË  
MINISTRIA E ARSIMIT  
DHE SPORTIT  
MINISTRI

Nr. 8148 Prot.

Tiranë, më 03.11.2014

**UDHËZIM**

Nr. 51, datë 03.11.2014.

**PËR DISA NDRYSHIME NË UDHËZIMIN NR. 46, DATË 20.10.2014 "PËR  
PROCEDURAT E PRANIMIT DHE TË REGJISTRIMIT NË CIKLIN E DYTË TË  
STUDIMEVE ME KOHË TË PLOTË "MASTER PROFESIONAL" DHE "MASTER I  
SHKENCAVE"/"MASTER I ARTEVE TË BUKURA" NË INSTITUCIONET PUBLIKE  
TË ARSIMIT TË LARTË, PËR VITIN AKADEMIK 2014 – 2015**

Në mbështetje të nenit 102 të Kushtetutës, neneve 34, 36 dhe 75 të Ligjit nr. 9741, datë 21.05.2007 "Për arsimin e lartë në Republikën e Shqipërisë", i ndryshuar; Vendimin nr. 668, datë 15.10.2014, të Këshillit të Ministrave "Për kuotat e pranimit dhe tarifat e shkollimit, në institucionet publike të arsimit të lartë, për programet e studimit të ciklit të dytë me kohë të plotë, "Master profesional" dhe "Master i shkencave"/"Master i arteve të bukura", për vitin akademik 2014-2015", Vendimin nr. 78, datë 08.02.2006 të Këshillit të Ministrave "Për krijimin e maturës shtetërore dhe pranimet në shkollat e larta publike", i ndryshuar, dhe Vendimin nr.1013, datë 10.12.2010 të Këshillit të Ministrave "Për Krijimin e Agjencisë Kombëtare të Provimeve (AKP)",

**UDHËZOJ:**

1. Pika 3 e Udhëzimit nr. 46, datë 20.10.2014, ndryshon si më poshtë:

*"3. Aplikimet në programet e studimit të ciklit të dytë me kohë të plotë "Master profesional" dhe "Master i shkencave"/"Master i arteve të bukura" të bëhen pranë sekretarive mësimore të njëjësive kryesore, nga data 20.10.2014 deri në datë 17.11.2014."*

2. Germat "a" dhe "b" të pikës 4 të udhëzimit, ndryshojnë si më poshtë:

*"a. Kanë përfunduar në Republikën e Shqipërisë me sukses studimet dhe janë pajisur me diplomën përkatëse ose me vërtetimin përkatës, sipas përcaktimeve në paragrafin e dytë të pikës 5 të këtij udhëzimi, në një program të ciklit të parë "Bachelor" ose në një program të integruar të studimeve të ciklit të dytë, i cili rezulton i akredituar në momentin e diplomimit të studentit;*

*b. janë diplomuar jashtë vendit në një program studimi të ciklit të parë Bachelor ose në*

*një program të integruar të studimeve të ciklit të dytë dhe kanë kryer njësimin e diplomës pranë MAS ose janë në proces njësimi.”.*

3. Germa “a” e pikës 5 të udhëzimit, ndryshon si më poshtë:

*“a. Fotokopje të diplomës të njësuar me origjinalin, të ciklit të parë të studimeve të përfunduar në Republikën e Shqipërisë.*

*Për kandidatët që kanë përfunduar studimet në IAL-të publike, në mungesë të diplomës, IAL-të pajisin kandidatin me një vërtetim që provon mbarimin e studimeve konform ligjit nr. 9741, datë 21.05.2007, “Për arsimin e lartë në Republikën e Shqipërisë”, i ndryshuar, dhe akteve nënligjore në zbatim të tij, si dhe lejon regjistrimin në ciklin e dytë të studimeve. Kandidati paraqet vërtetimin në IAL-në ku kërkon të regjistrohet sipas afateve të parashikuara në këtë udhëzim, dhe brenda 6 muajve dorëzon fotokopjen e njësuar me origjinalin të kartonit të diplomës të lëshuar nga IAL-ja përkatëse.*

*Për diplomat e fituara jashtë vendit, vërtetimin e njohjes në Republikën e Shqipërisë, të lëshuar nga MAS, të diplomës së ciklit të parë të studimeve të përfunduar jashtë vendit, të shoqëruar me fotokopje të diplomës të njësuar me origjinalin, ose, në mungesë të saj, të një dokumenti tjetër zyrtar mbi bazën e të cilit është kryer njësimi në Republikën e Shqipërisë, të lëshuar në vendin ku ka kryer studimet, që i lejon regjistrimin dhe vazhdimin e studimeve universitare në vendin përkatës. Në rast se nuk janë përfunduar procedurat e njësimit, kandidati dorëzon një vërtetim që konfirmon dorëzimin në MAS të dokumentacionit të parashikuar për njësimin e diplomës së ciklit të parë, dhe brenda 45 ditëve dorëzon vërtetimin përkatës të njësimit;”.*

4. Pika 7 e udhëzimit, ndryshon si më poshtë:

*“7. Brenda datës 21.11.2014, IAL-të publike të shpallin dhe të afishojnë listat e aplikantëve fitues në vende të dukshme, në mjediset e njësive kryesore përkatëse, si dhe në faqet web të IAL-së, të ndarë sipas programeve të studimit përkatës, të renditur sipas rendit zbritës të pikëve të grumbulluara nga aplikantët, në përputhje me kuotat e pranimeve, të miratuara.”.*

5. Pika 8 e udhëzimit, ndryshon si më poshtë”

*“8. Regjistrimi i kandidatëve në programet e studimit ku janë shpallur fitues të zhvillohet nga data 24.11.2014 deri në datën 26.11.2014, pranë sekretarive mësimore të njësive kryesore të IAL-së.”.*

6. Pika 10, e udhëzimit, ndryshon si më poshtë:

*“10. IAL-ja shpall në vende të dukshme, publikon në faqen e saj web, si dhe ia përcjell MAS elektronikisht listën emërore të kandidatëve të regjistruar brenda datës 27.11.2014.”.*

7. Pika 11 e udhëzimit, ndryshon si më poshtë”

*“11. Brenda datës 01.12.2014, IAL-të dorëzojnë në Agjencinë Kombëtare të Provimeve (AKP) listat përfundimtare në formë të shkruar dhe elektronike në format excel, me*

*regjistrimet e kryera për çdo program studimi të ciklit të dytë “Master Profesional” dhe “Master i shkencave”/”Master i Arteve të Bukura”, të plotësuara me qëllim pajisjen me numër matrikullimi në zbatim të Udhëzimit nr. 45, datë,19.12 2011, i ndryshuar. Për të gjithë emrat e studentëve të dërguar pas kësaj date nuk do të procedohet me dhënien e numrave të matrikullimit dhe do të kërkohet nga AKP-ja çregjistrimi i tyre.”.*

8. Pika 12 e udhëzimit, ndryshon si më poshtë:

*“12. AKP brenda datës 31.12.2014 i dërgon IAL-ve publike në rrugë postare, listën me numrat e matrikullimit të studentëve. IAL-të publike çrregjistrojnë studentët e papajisur me numër matrikullimi, si dhe ia komunikojnë çrregjistrimin AKP-së brenda 10 ditëve nga marrja e komunikimit zyrtar nga AKP me listat me numrat e matrikullimit.”.*

9. Ngarkohet Sekretari i Përgjithshëm, Drejtorja e Arsimit të Lartë dhe Shkencës, në Ministrinë e Arsimit dhe Sportit, Agjencia Kombëtare e Provimeve, si dhe Institucionet Publike të Arsimit të Lartë, për zbatimin e këtij udhëzimi.

Ky udhëzim hyn në fuqi menjëherë dhe botohet në “Fletoren Zyrtare”.

**LINDITA NIKOLLA**  
  
**MINISTËR**

